

定鄉小識卷九

錢塘張 道少南

山水記 九 雲泉山路

湖步西路南出爲石灰山有石灰嶺嶺下爲地塢爲松花塢爲楊梅隴爲鏡架山爲魚頭山爲前山有前山洞錢王洞泉爲大湖山爲靈山爲鮑家嶺爲雲泉山有風水洞下有觀音井遶山南出爲湖步溪出王安浦折而西至新塘爲燕子山至社井爲石和尚山下爲社井塢又西爲羅帶山爲翠屏山爲印山又西爲神山山北爲道士山爲萬丈山山北爲麻車山又神山南爲塘山爲筆架山又西近富陽爲長嶺山又東爲石嶺又西爲西山爲報山至富陽界爲算帳嶺

坵 湖塘山廟山

石灰山 康熙錢塘縣志郡志在石和尚山東六里高九十丈山惟石里人煉石爲堊山半有大嶺高五百丈長二里

石灰嶺 萬厯錢塘縣志粟山西爲石灰嶺康熙錢塘縣志茱萸尖下有石灰嶺舊邑志石灰嶺以業

名

嶺在湖步北俗呼石灰大嶺形家以為富陽祖
龍昔董蔗林相國會禁鑿石今嶺上有廢石宕
二深不可測旁則鑿燒如故也踰嶺為白沙塢
去茱萸尖甚遠

地塢 在石灰嶺下

松花塢

楊梅隴 在湖步

鏡架山 在湖步

魚頭山 康熙錢塘縣志郡志在石灰山東一里高

定鄉小識卷九

二

三十丈

前山 康熙錢塘縣志郡志在石和尚山北三里高
八百丈

前山洞

古名錢王洞

萬厓錢塘縣志大湖山有洞曰錢

王洞洞門二皆丈許中廣二三畝不見日泉乳所
結有長一二丈者紆回二十餘洞底有小窟窟下
大潭深不可測取石投之聲如洪鐘康熙錢塘縣
志山有七洞僧祖子曾以竹茅蒸火入三洞內微
明有巨石擊之如鼓聲山罅流泉涓涓滴下病目
即愈

山口第一洞縱橫約廣三四丈高丈餘穹窿如蓋石乳下垂第二洞偃僂而進高廣倍之第三四洞非臥行不能入洞內有石床石几石釜石鼎石書匣相傳昔仙人鍊形於此最後一洞有潭甚深蒼黝澄澈不可逼視中龍寶藏焉投以巨石其聲硃礮移時始絕潭岸石徑僅廣寸許不能容趾游者心悸此洞彷彿有光餘洞皆晦父老言二十餘洞昔盡明爽明季山寇柴日乾亂時居民避難入洞有孕婦媿子於內洞遂昏暗自後游人當然火而入矣道光乙未歲大旱

定鄉小識卷九

三

有龍見於洞昂首洞外形如牛吟聲如鐘數日乃隱洞中石氣陰寒而夏無蛇蝎亦一奇也洞在前山或曰泉山洞以其地近雲泉山也聶氏志云大湖山非

錢王洞泉 康熙錢塘縣志在大湖山

大湖山

俗作大和山

萬厯錢塘縣志茱萸尖之支東南

行爲大湖山山頂平廣可五六十畝

山與雲泉山峯巒連屬山巔有曲徑可上路口有雙石壁立如門廣僅容馬一人當關萬夫莫入真險隘處也入石門則土地平曠竹樹陰翳

彷彿古桃花源四圍峭壁聳翠形如削成不能
梯緣宋季先少傅越國公殉節匡山公子隱姓
名溷跡樵父遜居於此至死足不入城市所居
處礎石猶存明末山寇柴日乾結砦山中

靈山 康熙錢塘縣志郡志在縣治西南六十里高
二百丈周回二十里

鮑家嶺 萬厯杭州府志鮑家嶺在縣治西南五十
里東達官路至富陽

嶺在雲泉山側居人以鑿石燒灰爲業

雲泉山

俗呼
西山

在湖步口近楊村高聳奇秀挺入雲

定鄉小識卷九

四

際下有風水洞洞側爲慈嚴寺

是山從來舊志失載惟聶氏志云慈嚴寺在安
吉三圖雲泉山下而山川門乃繫風水洞慈嚴
寺於大湖山下則又誤合大湖雲泉爲一矣咸
淳志又誤以雲泉爲曇山遂云壘山在楊村有
慈嚴院不知曇山自在雲泉東也而翟氏湖山
便覽引咸淳志云壘山在楊村一名雲泉山有
慈嚴院今汪氏仿宋雕本咸淳志無一名雲泉
山五字蓋翟氏亦知咸淳志之誤而不敢徑標
雲泉故臆撰以通其說然非慎耶山半石壁有

宋人篆書雲泉靈洞四字則此山之名雲泉久矣又林和靖風水洞詩云因緣偶入雲泉路林下先聞接客鐘作志者何未見也

風水洞

古名恩德洞一名雲泉洞

在雲泉山杭州圖經洞去錢

塘縣舊治五十里在楊村慈嚴院洞極大流水不竭洞頂又有一洞清風微出故名曰風水洞白樂天長慶三年秋九月來游觀泉石竹木留詩咸淳臨安志在楊村慈嚴院舊名恩德院有洞極大流水不竭頂上又一洞立夏清風自生立秋則止夢梁錄楊村壘山慈嚴寺之後名風水洞西湖游覽

定鄉小識卷九

五

志下洞流水潺潺大旱不涸萬厯錢塘縣志大湖山下有風洞立夏風生立秋風止有水洞水極清澈風洞在雲泉山之半石竅甚窄其旁大石壁立宋人篆書雲泉靈洞在焉水洞在山麓慈嚴寺右深廣五六丈嵌空玲瓏石乳倒懸彷彿靈隱飛來峯下洞口下垂如重簾半捲洞內高邃明豁有石乳結成僧伽像背石面水左首右趺宛如琢畫洞北石壁有罅水之所出可容一人深黑莫測人不敢入水清見底綠淨如空以手探之始驚及腕水紋圓暈方知波動終古涓涓不

見其流入溪乃聞泉聲冬日有氣如釜上蒸暖
同溫泉夏則清冷徹骨偶一洗濯冷然汗止
山之雪西域之冰無以過之其應時協候與風
洞同也水源自大湖山有人以浮物驗之故酷
旱不涸洞昔有烏龍乃一童子所化慈嚴寺僧
圖其形藏之歲旱懸畫龍於洞門禱雨甚驗道
光乙未大旱龍自洞出村童投以石亦不動洞
外唐宋人摩厓題名十餘處雖石蘚剝蝕字跡
可讀蓋唐宋時江沙未漲波濤淼漫士大夫憚
於渡江皆緣山行故留題者多今則僻藏窮村
空山寂寂惟山僧樵父往來登眺峯猿澗鳥晨
昏飲浴而已游蹤久希名蹟遂闕矣又夢梁錄
及聶氏之譌辨詳雲泉山

白居易

長慶二年七月自中書舍人出守杭州

予以長慶二年冬十月到杭州明年秋九月
始與范陽盧賈汝南周元範蘭陵蕭悅清河
崔求東萊劉方輿同游恩德寺之泉洞竹石
藉甚久矣及茲日擊果愜心期因自嗟云到
郡周歲方來入寺半日復去俯視朱綬仰睇
白雲有媿於心遂留絕句

雲水埋藏恩德洞簪裾束縛使君身暫來不宿歸
州去應被山呼作俗人

范仲淹

字希文吳縣人累官戶部侍郎卒贈兵部尚書諡文正

皇祐元年正月乙卯自知鄧州移知杭州

風水洞

神仙一去幾千年自遣秦人不得還春盡桃花無
處覓空餘流水到人間

林逋

字君復錢塘人

風水洞

平昔嘗聞風水洞重山複水去無窮因緣偶入雲

定鄉小識卷九

七

泉路林下先聞接客鐘

元居中

錢塘人康定中台州守官至太常少卿熙甯二年與知杭州祖無擇詩人張先同游

風水洞

二洞標奇古連巖葺宇新涼生清桂曉暖漲碧桃
春間擁東方騎來尋北隴人破雲拖蠟屐琢句寫
霜筠譚劇頻飛屑歌長口落塵為探瓊巘勝不記
玉觴巡下客慚長穎高筵飲德醕追蹤到峯頂疑
化九霄身

蘇軾

熙甯四年通判杭州六年正月二十七日游風水洞時公年三十八李節推名必見

烏臺詩案及傅藻紀年錄

往富陽新城李節推先行三日留風水洞見待

春山磔磔鳴春禽此間不可無我吟路長諸書引作長路

今從集本漫漫傍江浦此間不可無君語金鯽池邊不

見君追君直過定山村路人皆言君未遠騎馬少

年清且婉風巖水穴舊聞名只隔山溪夜不行溪

橋曉溜浮梅萼知君繫馬巖花落出城諸書引作出行今從

集本三日尚透遲妻孥怪罵歸何時世上小兒誇疾

走如君相待今安有

風水洞二首和節推

風轉鳴空穴泉幽寫李志西湖志作瀉今從集本石門虛心聞

定鄉小識卷九

八

地籟妄意覓桃源過客詩難好居僧語不繁李志西湖

志作煩今從集本歸瓶得冰雪清冷慰文園

山前乳李氏西湖志作雨今從集本水隔塵凡山上仙風舞檜

杉細細龍鱗生亂石團團羊角轉空巖馮夷窟宅

非梁棟御寇車輿謝轡銜世事漸艱吾欲去永隨

二子脫譏讒

蘇轍字子由與兄同登進士舉制科

和子瞻題風水洞

風送江湖滿洞天洞門可聽入無緣土囊鬱怒聲
初散石齒聲牙勢未前樂奏洞庭真跌宕歌傳帝

所亦清便何人隱几觀遺韻重使顏成問答然

趙

抃

字閱道西安人熙甯三年四月以資政殿大學士知杭州

十年五月癸亥自知越州資政殿大學士右諫議大夫移知杭州

風水洞

風穴有聲連水洞聽風觀水暫閒身杭州未入從容甚且與南山作主人

司馬樵

字才叔温公光之從孫樵兄棫字才仲輟耕錄云才仲以東坡先生薦應制舉中等遂為錢塘幕官才叔之游風水洞其在省兄幕中時歟

游風水洞

藤梢蔓荒寒薜花蔭空青窈窕石竇中兩耳風雨

定鄉小識卷九

九

并初聞聲蕭騷活火急銅瓶再聽逗餘響萬羽起寒汀我疑此山空石腳連滄溟中有蛟龍蟄鼻息隱雷霆又疑仙翁去丹竈留巖扃至今爐鼎中水火爭不停山前老比丘霜眉眼如螢能傳古老語濯吾耳昕醒便欲委塵凡脫拔隨爽靈

張商英

字天覺蜀州新津人大觀三年十二月以龍圖閣學士知杭州

風水洞

嶺頭松竹自生寒兩穴茫茫徹鬼關風竊虎威時
弄草泉欺龍睡故離山不嫌浙瀝驚人耳聊挹清
冷洗病顏窗外月高湘簟冷更無閒夢到人間

許

遵

字仲途泗州人與蘇東坡游蘇有次韻滕元發許仲途秦少游及次韻許遵詩

風水洞

水洞連風洞精藍兩洞前山高易藏日樹老不知
年板有華宗什名留少傅篇煙波門外境寂寞變
桑田

錢惟善

風水二洞

空穴風來自吸噓垂巖出水綠

李氏西湖志作广

渠渠天

門此際通閩闔海眼何年洩尾閭隱者難招應化

鶴飛仙可挾

西湖志作採

更乘魚留題太守懷蘇白好

定鄉小識卷九

十

事今無五馬車

吳農祥

字慶伯號星叟一號大滌山樵錢塘人康熙己未薦舉鴻博有梧園集

風洞

臨江石屋見曾稀鮮飈長夏寒侵衣紅雨青精結
乳竇丹梯綠樹開巖扉春深鹿女采藥去日暮龍
神持鉢歸江干勝事頗幽絕與君攜手又斜暉

魏

嶮

字陟庵南樂人康熙丙戌進士知錢塘縣事廉潔自矢有循吏風

風洞

富春潮退長漁竿石洞爭披薜荔看夜夜月華生
白苳年年江雨浴紅蘭

十里層巒洗眼看參差風竇影珊珊與君滿酌玻璃酒堪敵江干六月寒

鄭永祺

風水洞

水洞兼風洞低昂兩竅張四時微籟起千古一流
長僧院依泉靜松陰遶澗蒼小亭通廣陌曲徑達
崇岡籜粉含新色藤花吐細香蟬喧幽樹迥雲定
翠巒涼撫景神先爽消閒暑已忘蘇公會眺覽白
傅昔徜徉人去山靈怨詩留石壁荒雅游誰復繼
清嘯我何妨過客登臨寂驚禽雜遝翔殿傾塵壘

定鄉小識卷九

十一

疊碑斷蘚穰穰地茵生殘瓦煙蘿覆壞牆蕭條棲
古佛零落廠禪房遐想當年勝回思此日傷廢興
都是幻門外幾滄桑

許承祖

風水洞

風轉水流恩德洞披風激水縱閒身留題千載懷
蘇白句裏笙簧韻更新

蘇軾

臨江仙

風水洞

四大從來都徧滿此間風水何疑故應爲我發新
詩幽花香澗谷寒藻舞淪漪借與玉川生兩腋
天仙未必相思遠憑流水送人歸層巔餘落日草
露已沾衣

嚴

沆

字子餐號顯亭餘杭人順治乙未
進士官戶部侍郎著有皋園集

水洞

水洞泉聲靜冰輪月色寒紅霞逼霄漢碧雨動波
瀾驚鵲知秋曙潛魚躍夜闌秋毫真可數倚棹許
誰看

顧豹文

字季蔚號且庵錢塘人順治乙
未進士官至御史有世美堂集

定鄉小識卷九

三

水洞

水府泉新落江門月上初斜飛金蟾竦爭碾玉蟾
蜍瑤闕沉深夜銀河下太虛相思不相見東望渺
愁余

觀音井

夢梁錄楊村路上有觀音井

今風水洞側有穴流水成池池中有石突出名
曰觀音洞疑卽井也

湖步溪

一作塢
埠溪

萬厓錢塘縣志塢埠溪環大湖山

出楊村王安浦入於江

溪有十八曲相傳烏龍由溪入江聞母呼哭聲

則一回頭凡十八回溪遂有十八折俗名望孃十八灣

王安浦一名楊村浦

萬厯錢塘縣志塢埠溪出楊村王

安浦

浦在楊村上接湖步溪下達周家浦入江緣浦有閘有壩以時開閉灌田甚廣

燕子山 康熙錢塘縣志郡志在石和尚山稍東高十丈

山今在新塘以形如燕故名

石和尚山 萬厯杭州府志石和尚山在縣治西南

定鄉小識卷九

三

六十五里高六百丈周回十里山巔巨石如僧伽狀故名萬厯錢塘縣志茱萸尖之支東南行爲石和尚山康熙錢塘縣志郡志在縣治西南六十五里高六百丈周回一里山巔巨石狀如僧伽故名山在社井塢山頂石峯矗列如龍脊鱗鬣有石如人竦立山巔遠近望之奇肖

社井塢 在社井山中有龍池寺

羅帶山 萬厯杭州府志主山高百丈周回二十里左右羣峯迤邐環繞若羅帶然萬厯錢塘縣志茱萸尖之支東南行爲羅帶山康熙錢塘縣志郡志

在縣治西南七十里高百丈周回二十里羣峯環列縹緲若羅帶縣西南諸山惟此多虎

翠屏山 康熙錢塘縣志郡志在羅帶山北三里

印山 康熙錢塘縣志郡志在羅帶山東三里溪水環圍形若浮印去南五里爲富陽界

神山 萬厯杭州府志在縣治西南六十里高四百丈周回四里萬厯錢塘縣志茱萸尖之支東南行爲神山康熙錢塘縣志郡志在縣治西南六十里高四百丈

道士山 康熙錢塘縣志郡志在神山北一里

定鄉小識卷九

古

萬丈山 康熙錢塘縣志郡志在神山北三里山形險絕至者卻步

麻車山 康熙錢塘縣志郡志在萬丈山北一里今近社井有地名金麻車其卽山所在歟

塘山 康熙錢塘縣志郡志在神山南一里

筆架山 康熙錢塘縣志郡志在神山南三里

長嶺山 康熙錢塘縣志郡志在神山西三里接富陽山其北爲餘杭山

石嶺 萬厯杭州府志在神山東峻極人不易登南通上埠

西山 萬厯杭州府志在縣治西南六十里高七百丈周回二十里康熙錢塘縣志郡志在縣治西南六十里高七百丈周二十里西連富陽界之廟山成化志云有報山無西山疑卽報山多虎

報山 咸淳臨安志報山近廟山

新嶺 俗名算帳嶺在富陽界嶺東爲錢塘嶺西爲富陽二邑於此判界然實平坦非嶺也

湖塘山 俗名大嶺頭

湖埭山 俗名大嶺頭

廟山 古名廟子山

咸淳臨安志去城 康熙錢塘縣志引城字上有州字

定鄉小識卷九

五

五十里突出江心潮勢至此方殺夢梁錄巫山頭名廟山又謂之椽山成化杭州府志在縣治西南去城十五里 十五乃五 康熙錢塘縣志廟山西去

爲富陽江界湖山便覽在曇山西近富陽縣境處

宋史袁韶傳云韶知桐廬縣錢塘岸歲爲潮齧率取石桐廬韶言廟子山有石不必旁取鄰郡遂得永免嘉定四年召爲太常寺主簿父老旗鼓蔽江以餞至於富陽泣謝曰吾曹不復輸石矣所云廟子山卽此至夢梁錄巫山椽山之名久不著胡敬崇雅堂詩集注云浮山今土人呼

巫山頭蓋浮與巫一聲之轉然據夢梁錄則定鄉本自有巫山頭胡氏亦不能確指巫山爲廟山也是山跨屬錢塘富陽故兩邑志乘皆著於錄今已屬富陽宋時潮殺於此今定鄉已爲桑田江身束狹潮至潭頭渡漸次殺小不俟至廟山矣

王同祖

字與之號花洲金華人清祐中官建康府通判改添差沿江制置使機宜文字著有學詩初稿

廟山道中

蕭蕭疎雨點孤篷舟子招呼語順風小麥青青春

定鄉小識卷九

去

卻半一犁江上看田翁

定鄉小識卷九